



سلسلة شرح

مدارج السالكين

للإمام ابن القيم - رحمه الله -

د. أبو بكر القاضي

المستوى الأول: (من منزلة اليقظة إلى منزلة التوبة)

www.abobakrelkady.net

  abobakrelkady  AboBakr Elkady

المحاضرة الحادية عشرة

«السلام عليكم ورحمة الله وبركاته»

بسم الله، والصلاة والسلام على رسول الله صلى الله عليه، وعلى آله وصحبه وسلم، ثم أما بعد:
فإن أصدق الحديث كتاب الله، وأحسن الهدي هدي محمد ﷺ، وشر الأمور محدثاتها، وكل محدثةٍ بدعة، وكل بدعةٍ ضلالة، وكل ضلالةٍ في النار، ثمّ أما بعد:

افتتح الله تبارك وتعالى سورة الصف بنداء (الَّذِينَ آمَنُوا)، يُمثل معركة يخوضها العبد كل يوم، بل كل لحظة مع نفسه الأمارة بالسوء، ومع شيطانه الذي يجري منه مجرى الدم من العروق.

والخطر في هذه المعركة أن الهزيمة فيها يؤدي بعد ذلك إلى الانتكاس عن الطريق؛ عن الطريق إلى الله تعالى، بل ترك الطريق بالكلية يؤدي الهزيمة في هذه المعركة إلى نفاق، يحول بين العبد وبين ربه تبارك وتعالى طيلة حياته، وطيلة عمره، قال تعالى: {يَا أَيُّهَا الَّذِينَ آمَنُوا لِمَ تَقُولُونَ مَا لَا تَفْعَلُونَ * كَبُرَ مَقْتًا عِنْدَ اللَّهِ أَنْ تَقُولُوا مَا لَا تَفْعَلُونَ} [الصف: ١، ٢]

معركة متجددة يعيشها العبد في كل لحظة من لحظات حياته.

- هل هو يقول ويفعل؟

- هل هو يعلم ويعمل؟

- هل هو يعلم ويطبق؟

سؤال مع كل معلومة، ومع كل آية، ومع كل حديث يتردد في مسامع العبد، ومع كل علم يقرأه أو يتعلمه. {يَأْتِيهَا الَّذِينَ ءَامَنُوا لِمَ تَقُولُونَ مَا لَا تَفْعَلُونَ} شبح النفاق، وشبح المعصية يقاوم، ويقتمح العبد في كل ناحية من نواحي حياته.

فينبغي عليه أن يسأل نفسه: هل هو يقول ويعمل؟.. أم لا؟

في الحديث الصحيح عن النبي ﷺ قال: "يُؤْتَى بِالرَّجُلِ يَوْمَ الْقِيَامَةِ، فَيُلْقَى فِي النَّارِ، فَتَنْدَلِقُ أَقْتَابُ بَطْنِهِ، فَيَدُورُ بِهَا كَمَا يَدُورُ الْحِمَارُ بِالرَّحَى، فَيَجْتَمِعُ إِلَيْهِ أَهْلُ النَّارِ، فَيَقُولُونَ: يَا فُلَانُ مَا لَكَ؟ أَلَمْ تَكُنْ تَأْمُرُ بِالْمَعْرُوفِ، وَتَنْهَى عَنِ الْمُنْكَرِ؟ فَيَقُولُ: بَلَى، قَدْ كُنْتُ أَمُرُ بِالْمَعْرُوفِ وَلَا آتِيهِ، وَأَنْهَى عَنِ الْمُنْكَرِ وَآتَيْتِهِ" [البخاري ومسلم]

المشكلة الجديدة في هذا الحديث للمتأمل فيه: أن الرجل لم يدخل النار وحده؛ بل دخل النار مع من كان يدعوهم إلى الله، مع من كان يعلمهم.. دخل النار مع من كان يأمرهم وينهاهم.. لماذا؟ لأن الشخصية المشوهة التي يخالف ظاهرها باطنها لا تنتج إلا شخصيات مشوهة.

هم يقولوا له ما لك إيه اللي دخلك هنا؟ إيه اللي جايبك معنا هنا؟ طب احنا اللي جابنا أعمالنا، إنت بقى إيه اللي جابك هنا؟ ده إنت كنت بتقول كلام زي العسل!

كنا بنسمع الكلام من هنا.. هي دي اللحظات اللي كنا بنعيشها مع الله... إزاي إنت جيت هنا؟

- احنا كنا بنسمع منك وما بنطبقش.

- نخلص الدرس وبننسى.

- نخلص سماع الموعدة وبنزوغ في الدنيا.

إنت بقى إيه؟

ده إنت كنت بتقول الموعدة.

إياك تكون زينا؛ كنت بتقول حاجة وحياتك حاجة ثانية.

كنت بتدعي حاجة وقلبك حاجة ثانية {لِمَ تَقُولُونَ مَا لَا تَفْعَلُونَ}

حرب مع نفسك الأمانة بالسوء، مع شيطانك الذي يجري منك مجرى الدم من العروق، ويفضل الإنسان يقول و ما بيعملش!

في الأول معصية، بعد كده الموضوع بيكبر يا جماعة بيخرج من إيديه... إزاي يعني؟ اه
{وَمِنْهُمْ مَّنْ عَاهَدَ اللَّهُ لَئِنْ آتَانَا مِنْ فَضْلِهِ لَنَصَّدَّقَنَّ وَلَنَكُونَنَّ مِنَ الصَّالِحِينَ} [التوبة: ٧٥]

كلام.. ماتاخذش منه إلا الكلام.. يعرف يشتغلك كويس قوي، ويحور عليك كويس قوي.
وبعد ما إنت ماتخلص من هنا.. مش بعد ما إنت تخلص، هو وهو بيتكلم معاك قلبه مش معاه
{فَلَمَّا آتَاهُمْ مِّنْ فَضْلِهِ بَخِلُوا بِهِ} [التوبة: ٧٦] قلبه تايه منه.

فلما آتاهم من فضله بخلوا به:

- جاله بقى الفلوس.

- جه وقت الوفاء.

- جه وقت أنه يوفي الدين مع ربنا.

بخلوا به {وَتَوَلَّوْا وَهُمْ مُعْرِضُونَ * فَأَعْقَبَهُمْ نِفَاقًا فِي قُلُوبِهِمْ إِلَى يَوْمِ يَلْقَوْنَهُ بِمَا أَخْلَفُوا اللَّهَ مَا وَعَدُوهُ وَبِمَا كَانُوا يَكْذِبُونَ} [التوبة: ٧٦، ٧٧]

بقول عليها العقوبات اللي ما فيهاش reways.

ما تعرفش تجيب reways

(ما تعرفش ترجع) خلاص كده العربية ماشية باتجاه واحد.

يفضل ماشي في اتجاه واحد إلى أن يسقط في جهنم.

كثير منا مش فاهم هو بيتعامل إزاي، و بيتعامل مع مين؟ وماشي فين؟ فإكر إن الموضوع سهل يسير.. مهما عمل، ومهما خلى، ومهما سوى: أستغفر الله العظيم.

لا لا.. سبحان الله وبحمده مائة مرة تغفر لي كل ذنوبي ولو كانت مثل ذهب زبد البحر.

تتعامل مع من؟ تخادع من؟

ده إنت لو اتعاملت كده مع طفل ..هيكشفك، صح ولا لا؟

ينفع دلوقتي تأخذ من طفل الربع جنيه بتاعه!

دلوقتي ما حدش بياخذ ربع جنيه.. تأخذ الجنيه بتاعه، وتطبطب عليه.. خلاص كده! ولا هيحاسبك، وعملت كده ليه؟

بتتعامل مع مين؟ بتتعامل مع مين؟

العليم الخبير {وَلَهُ الْمَثَلُ الْأَعْلَىٰ فِي السَّمَاوَاتِ وَالْأَرْضِ ۗ وَهُوَ الْعَزِيزُ الْحَكِيمُ} [الروم: ٢٧]

إنت مش فاهم أنك قبل أن يخطر على بالك خاطر، وقبل أن تسري كهرباء مخك في جسدك يعلم خفايا نفسك {لَمْ تَقُولُوا مَا لَا تَفْعَلُونَ}؟ ليه دايمًا إنت بتقول حاجة وتزوغ منها؟
بتسمع الحاجة وتزوغ منها، زي الناس اللي بتزوغ في المدارس.

هو عارف كويس إنه المفروض يحضر، وأن المفروض يتعلم، وأن في امتحان، ومع ذلك بيزوغ من على السور... ليه بيزوغ من على السور؟ هومش عارف إن اللي هو بيعمله ده غلط؟ عارف وممكن لما تيجي تواجهه ينكر، ومع ذلك بيزوغ.

{وَإِذْ قَالَ مُوسَىٰ لِقَوْمِهِ يَا قَوْمِ لِمَ تَأْتُونِي بِتُؤْذُنِي ۖ وَقَدْ تَعْلَمُونَ أَنِّي رَسُولُ اللَّهِ إِلَيْكُمْ} [الصف: ٥] موسى عليه السلام يكلم بني إسرائيل.

ياترى يا قومي إنتوا بتأذوني ليه؟

أذى بني إسرائيل يا جماعة تعدي الحدود، تعدي الآفاق الذهنية.

* مش مجرد بقى {فَأَذْهَبَ أَنْتَ وَرَبُّكَ فَقَاتِلَا إِنَّا هَاهُنَا قَاعِدُونَ} [المائدة: ٢٤]

* مش مجرد ذبحوا البقرة:

- طب البقرة عاملة إزاي؟

- طب لونها إيه؟

- طب هي فين؟ مكابرة.

* مش مجرد: {اجْعَلْنَا إِلَهًا كَمَا لَهُم آلِهَةٌ} [الأعراف: ١٣٨]

لا لا، منتهى الصفاقة قالوا عن موسى عليه السلام: أدر يعني عظيم الخصيتين عيب في الجهاز التناسلي.

إيه اللي بتقوله ده؟ النبي ﷺ قال هذا: "كَانَتْ بَنُو إِسْرَائِيلَ يَغْتَسِلُونَ عُرَاءَ، يَنْظُرُ بَعْضُهُمْ إِلَى بَعْضٍ، وَكَانَ مُوسَى ﷺ يَغْتَسِلُ وَحْدَهُ- كان رجل حيي-، فقالوا: وَاللَّهِ مَا يَمْنَعُ مُوسَى أَنْ يَغْتَسِلَ مَعَنَا إِلَّا أَنَّهُ آدُرٌ- أي عيب-"

تتعجب إنت (كليم الرحمن) يتكلمون عنه بالأسلوب ده؟

بالأسلوب الصفيق ده؟ بالأسلوب المبتذل ده؟ وقد برأه الله تعالى من ذلك: فَذَهَبَ مَرَّةً يَغْتَسِلُ، فَوَضَعَ ثَوْبَهُ عَلَى حَجْرٍ، فَفَرَّ الْحَجْرُ بِثَوْبِهِ، فَخَرَجَ مُوسَى فِي إِثْرِهِ، يَقُولُ: تُوْبِي يَا حَجْرُ، حَتَّى نَظَرْتَ بَنُو إِسْرَائِيلَ إِلَى مُوسَى، فَقَالُوا: وَاللَّهِ مَا بِمُوسَى مِنْ بَأْسٍ، وَأَخَذَ ثَوْبَهُ" [البخاري ومسلم]

فَرَأَوْا أَنَّهُ أَحْسَنُ الْخَلْقِ {يَا أَيُّهَا الَّذِينَ آمَنُوا لَا تَكُونُوا كَالَّذِينَ آذَوْا مُوسَى فَبَرَّاهُ اللَّهُ مِمَّا قَالُوا}

[الأحزاب: ٦٩]

وكان عند الناس وجيها؟ طب عند المؤمنين وجيها؟

طب عند بني إسرائيل المؤمنين منهم وجيها؟

لا مش مشكلة البشر كلهم.

أمال مين؟ القضية في إيه؟ { **وَكَانَ عِنْدَ اللَّهِ وَجِيهًا** } [الأحزاب: ٦٩]

طب البشر؟ طب المؤمنين؟ طب العوام؟ طب الناس؟

مش مشكلة، المهم عند الله وجيها.

{ **يَا قَوْمِ لِمَ تُوذُونَنِي** } [الصف: ٥] وأنتم عارفين!

ليه بتعمل غلط وانت عارفه؟

- عارف إن ربنا أمر بكده وما بتعملش!

- عارف إن ربنا نهى عن كده وتعمله!

لا ده انت بتدعوا وما بتعملش.. بتزوغ.

المشكلة الكبيرة: هتفضل تزوغ لغاية ماتيجي العقوبة اللي مفهاش

ال reways اللي هي إيه بقى؟ { **فَلَمَّا زَاغُوا أَزَاعَ اللَّهُ قُلُوبَهُمْ ۗ وَاللَّهُ لَا يَهْدِي الْقَوْمَ الْفَاسِقِينَ** }

[الصف: ٥] وانتهت القضية.

تقولي هيرجع... مش هيعرف يرجع { **سَأَصْرِفُ عَنْ آيَاتِيَ الَّذِينَ يَتَكَبَّرُونَ فِي الْأَرْضِ بِغَيْرِ**

الْحَقِّ } [الأعراف: ١٤٦]

يمهلك مرة، واثنين، وثلاثة، ويستر عليك، و يحلم عليك، و يتوب عليك؛ لغاية ما إنت تهتك

ستره، ويمتد عصيانك، وتفضل تزوغ.

لغاية ما يزيغ قلبك؛ وساعتها عايز ارجع.. مش عارف ارجع!

{وَأَعْلَمُوا أَنَّ اللَّهَ يَحُولُ بَيْنَ الْمَرْءِ وَقَلْبِهِ} [الأَنْفَال: ٢٤]

مش قادر... مش قادر أتوب.

أو يأتيه الموت قبل أن يفكر في التوبة.

التزويغ.. التزويغ اللي عمله أصحاب السبت.

متصطادوش سمك أيام السبت.. واضح الكلام ولا مش واضح؟

واضح جدًا، واضح خالص: إن السمك ما يدخلش شبكة يوم السبت، اعتقد الكلام واضح... اه

واضح، بس احنا بقى مش فاهمين.

أقول لك: إنت مش فاهم!

اه أنا مش فاهم، وإنت فاهم بس بيعمل إيه؟

بيحور.. بيزوغ... أنا هحط الشبكة يوم الجمعة، وأخذها الأحد، ولا من شاف ولا من دري.

احنا الكلام يوم الجمعة مفتوح، والكلام يوم الأحد مفتوح، الدنيا مفتوحة متضيقوهاش بقى.

تقوله: طيب ما الشبكة دخل فيها السمك يوم السبت؟

يقولك: أنا خذتها امتى؟ أنا حطيتها امتى؟ أنا ماليش دعوة السمك يدخل فيها.. ما يدخلش المهم

إن أنا حطيتها الجمعة واخذتها الأحد! آه عامل نفسه مش واخذ باله.

بيعمل إيه يا جماعة؟

بيزوغ... لو مدرس شافه وهو بينظ من على السور.

يقول له: لا أنا كنت بس بنظف السور، بشوف الحاجات اللي فوق دي...حبكت دلوقت طيب ما بعد المدرسة تنظف ياخويا، دلوقتي اتنصف!

اه.. بيعمل إيه؟ بيزوغ، ولما يتكلم معاه يقولك: أصل أنا مش فاهم مش واخد بالي، لكن في الحقيقة هو واخد باله، وعارف...مرة هتعدى.. الثانية هتعدى.. الثالثة ممكن تعدي... الرابعة هيلاقى قلبه اتقفل.

أصحاب السبب قلبهم اتقفل، يعني إيه قلبهم اتقفل؟

بيتكلموا معاهم مبيسمعوش {وَتَرَاهُمْ يَنْظُرُونَ إِلَيْكَ وَهُمْ لَا يُنصِرُونَ} [الأعراف: ١٩٨]

{وَلَوْ عَلِمَ اللَّهُ فِيهِمْ خَيْرًا لَأَسْمَعَهُمْ} [الأنفال: ٢٣]

الناس بتعظهم، وبتتكلم معاهم ليل ونهار.

تقرأ عليه القرآن من الفاتحة إلى الناس ومش سامع مش فاهم إيه ده؟ ده الآيات تحرك الجبال، دي المواعظ تحرك ولو كان قلبك حجر!

إيه اللي حصل؟ اتقفل {بَلْ طَبَعَ اللَّهُ عَلَيْهَا بِكُفْرِهِمْ} [النساء: ١٥٥]

- لماذا يطبع على القلب؟

- لماذا يقسو القلب؟

بسبب الكفر، أو التكذيب، أو المعصية.

يفضل يعصي.. يعصي.. يعصي.. {كَلَّا طَبْلٌ سِرَّانٌ عَلَى قُلُوبِهِمْ} [المطففين: ١٤] إيه؟ {مَا كَانُوا
يَكْسِبُونَ} [المطففين: ١٤]

كثير قوي ييجي يشتكي يقول لك: قلبي مش حاسس بيه.

أنا خلاص رمضان على الأبواب، و مش حاسس بقلبي.

مش حاسس بقلبي في الصلاة، مش حاسس بقلبي في القرآن!

السبب الذنوب، المعاصي بكل بساطة، طب إنت محتاج إيه؟

- محتاج صنفرة يا باشا.

- محتاج دعك، وفي بعض الدهون في الحل بتحتاج سلك.

- محتاجين توبة من نوع تقيل ينظف كل البلاوي دي اللي في القلب بسبب الذنوب.

يبقى هو هيفضل يزوغ.. يزوغ.. يزوغ؛ حتى يزيع الله قلبه

دي الكارثة (العقوبة): أن يزيع الله قلبه.

بعد كده يا جماعة مش هيفكر يدور عليه.. إيه إيه؟

مش هيفكر يدور على قلبه أصلاً: الآخرة، الجنة، النار، الحلال الحرام، يقول لك: فكك.

تقول له: ربنا حرم الكلام ده.

يقولك: وقت الله.. يعين الله، الحساب يوم الحساب.

يا عم افهم .. يهديك يرضيك .. أي حاجة .. استهدي بالله، مافيش، ما بيسمعش...ليه؟ عشان بصيرة القلب قد انطمست.

اللي هي بصيرة إيه يا جماعة بقي؟ بصيرة الأمر والنهي.

كل أمر ونهي بيخلفه، وعنده تبرير.

زي ما قلت لك بقي: أصل أنا مش واخذ بالي.. أصل أنا مش فاهم، وممكن يكون من الدعاة كمان!

تقولي إزاي؟ اه .. مش أصحاب السبب في ناس قاعدة تأمر وتنهي، وفي ناس عملت إيه يا جماعة؟ سكتت عن الأمر والنهي، وده واجب، والسكوت عنه معصية.

عندهم تبرير {لَمْ تَعْظُونَ قَوْمًا ۗ اللَّهُ مُهْلِكُهُمْ أَوْ مُعَذِّبُهُمْ عَذَابًا شَدِيدًا} [الأعراف: ١٦٤]

أنتوا بتضيعوا وقتكم ليه؟ ده إنت كمان عندك تأصيل شرعي، ده إنت كمان بتأصل لهم.

{اللَّهُ مُهْلِكُهُمْ أَوْ مُعَذِّبُهُمْ عَذَابًا شَدِيدًا} أنتوا بتتكلموا ليه؟

طيب ما تسبب يا عم الناس تتكلم إيه المشكلة؟

لا.. ما سيبش الناس تتكلم... أنا أبين كمان التبرير بتاعي اللي هو أصلاً بعيد عن الحجة بس إيه اللي حصل؟ القلب قد زاغ؛ أصبحت كل تصوراته زائغة، كلها تايهة، كلها متشردة، كلها تائهة عن الحق، وكمان ممكن تجده بيكون بيأصل لها.

عشان كده يا جماعة المعاصي بريد الكفر، وكثرة المعاصي تؤدي إلى الانحراف العقدي والفكري.

في ناس دايماً بتفصل بين العلم والعمل، يقول لك:

- لا ده هو عقيدته سليمة جداً، وفي نفس الوقت بيعصي!

- لا ده شيخ، بس يعصي!

- لا ده بيتعلم وطالب علم وبيعصي!

- لا ده بيحضر معانا الدرس بس بيعصي!

لا معصية في معصية في معصية.. سيسقط القلب.

القلب يا جماعة هيسقط شبكة.

طبيعي ماهو مافيش شحن، إنت ما بتدفعش.. يقولك: عفوا لقد نفذ رصيدك خلاص، وبعدين

يقطع، وعندك الخدمة بعد فترة السماح.

بعد السماح هيسقط شبكة، هتيجي تطلب مش هتلاقي أصلاً مش هتلاقي شبكة، هتيجي تدور

على قلبك مش هتلاقيه.. ده إنت ممكن كمان متدورش عليه، و يكون قلبه اتدفن تحت التراب من

سنين، وهو ما حضرش الجنازة ولا أخذ العزاء ولا سأل عليه: {فَلَمَّا زَاغُوا أَزَاغَ اللَّهُ قُلُوبَهُمْ}

[الصف: ٥]

يقول ابن القيم: "البصيرة في الأمر والنهي، وهي تجريده عن المعارضة"

تجريد إيه يا جماعة؟ الأمر والنهي عن المعارضة.

- يجيلك أمر... ماتعرضش.

- يجيلك نهى... ماتعرضش.

بنو إسرائيل لما قال لهم: {إِنَّ اللَّهَ يَأْمُرُكُمْ أَنْ تَذْبَحُوا بَقْرَةً} [البقرة: ٦٧]

ابتدينا ياعم إنت حتذبح حاجة ثانية غير بقرة ..دي بقرة {أَتَتَّخِذُنَا هُزُورًا} [البقرة: ٦٧] بدأت الـ ..
إيه؟ المعارضة.

طالعين في الزور.. إنت بتألس علينا؟

احنا بنقول لك: إن ناس بتقتل قبلتين بيقتلوا من بني إسرائيل، وحصل بينهم قتل و هتقوم
حرب.

قالوا: أتقتلون وبينكم موسى عليه السلام؟ قالوا: اذهبوا إليه.

فقال: {إِنَّ اللَّهَ يَأْمُرُكُمْ أَنْ تَذْبَحُوا بَقْرَةً}

طيب احنا بنتكلم في قتل، ودم، ومشاكل، وأزمة، وحرب بعدها تقول لي بقرة!

اه .. أقول لك بقرة، و عليك أن تقول سمعنا وأطعنا.

طيب إيه علاقة الـ؟ ملكش دعوة هو كل حاجة عايز تفهم علاقتها!

{وَمَا كَانَ لِمُؤْمِنٍ وَلَا مُؤْمِنَةٍ إِذَا قَضَى اللَّهُ وَرَسُولُهُ أَمْرًا أَنْ يَكُونَ لَهُمُ الْخِيَرَةُ مِنْ أَمْرِهِمْ}

[الأحزاب: ٣٦]

أنت لا تعلم كل شيء... أنت لا تحيط بكل شيء.

أنت أوتيت من العلم قليلاً.. دي طبيعتك البشرية.

{قَالَ أَعُوذُ بِاللَّهِ أَنْ أَكُونَ مِنَ الْجَاهِلِينَ} [البقرة: ٦٧]

{قَالُوا ادْعُ لَنَا رَبَّكَ يُبَيِّنْ لَنَا مَا هِيَ} [البقرة: ٧٠]

{قَالُوا ادْعُ لَنَا رَبَّكَ يُبَيِّنْ لَنَا مَا لَوْئِهَا} [البقرة: ٦٩]

{ادْعُ لَنَا رَبَّكَ يُبَيِّنْ لَنَا مَا هِيَ إِنْ الْبَقَرُ تَشَابَهَ عَلَيْنَا} [البقرة: ٧٠]

إيه يا عم في إيه؟

ابن الجوزي رحمه الله يقول: "أمرت بني إسرائيل أن يذبحوا بقرة؛ فذبحوها وما كادوا يفعلون" مش الجلدة بقى، اشد شوية.. يعني مش عايزة تطلع دي بقرة.

وأمر الخليل أن يذبح ابنه {فَلَمَّا أَسْلَمَا وَتَلَّهُ لِلْجَبِينِ} [الصافات: ١٠٣] هو كده في ناس كده تقول له: اذبح ابنك، اذبح نفسك.

يقول لك: معاك

ثاني اخر تقوله: اذبح فرخة، يقول لك: ايدي وجعاني.

يا عم دي فرخة.. لا برضوا.

معارضة على طول الخط.. اه تجريد الأمر والنهي عن المعارضة بتأويل: {لِمَ تَعْظُونَ قَوْمًا لَا إِلَهَ إِلَّا اللَّهُ} مُهْلِكُهُمْ

اه.. يقول لك إحنا سايبين الأمر والنهي، بس اوعى تفكر إن إحنا سايبينه تكاسل، احنا سايبينه

عشان عارفين بس مافيش فايده!

إيه اللي أدراك إن ما فيش فايده؟

إيه أدراك إن ما فيش فائدة، وده كلام كثير بنسمعه مش بس من أصحاب السبت!

لا.. من ناس كثير عايشين بينا يقول لك: مفيش فايده يا عم!

يعمل زي التمثال اللي موجود في محطة الرمل ده ..مفيش فايده.

خلاص ويدي ظهره للناس.

لا يا اخويا: الداعية إلى الله ما فيش حاجة عنده اسمه مفيش فايده.

في فايده وما تعرفش الفايده هتيجي امتي؟

الرجل اللي هو من أصحاب الغار رقم اثنين اللي قال إيه:

اللهم إنك تعلم أنه كان لي ابنة عم أحبها أشد ما يحب الرجال النساء فأصابتها سنة فراودتها عن نفسها.

حصل لها مشكلة قال لها: مش هديك الفلوس غير لما تسلميني نفسك، فأسلمت له نفسها حتى قعد بين رجلها.

رجل وصلت به الخسة أن يراود امرأة من أجل الفلوس، ده في خير ده؟ ده في فايده ده؟

قالت له: اتق الله، ولا تقض الخاتم إلا بحقه.

اتق ربنا... اتق ربنا دلوقتي!

إيه رأيك بقى إنه كان في ذرة خير وقلبه لقط شبكة في الوقت ده؟

والشبكة ثلاث شرط، وقام عنها "فقتت عنها وهي أحب الناس إلي"

في ناس صالحة اللحظة دي بتوقعهم.. ناس صالحة ومصلحة بس لحظة الضعف دي توقع
الجبل، دي قومت اللي إنت بتقول عليه مافيش فايده!

"اتق الله، ولا تفض الخاتم إلا بحقه؛ فقامت عنها وهي أحب الناس إلي"

إياك تياس وتقول لحد: مافيش فايده، وقبل كده إياك تياس من نفسك وتقول: أنا ما فيش فيا
فايدة، ومتياسش من حد وتقول ما فيش فائدة فيه؛ لأن ممكن يكون لسة عنده ذرة خير ومش
حتصحى إلا عندما يأذن الله، بس هو لازم يأخذ بأسباب صحيان ذرة الخير دي.

"وهي تجريده عن المعارضة بتأويل، أو تقليد"

تقول له يا سيدي: البتاع ده حرام، الموسيقى حرام.

يقول لك: معلش في ناس قالت إن هي حلال، وأنا مقلد!

يعني حبكت التقليد دلوقتي؟

اه.. أنا بقلد، أصل أنا مقلد.

عارف يعني أحكام المقلد قوي! طيب ايه رأيك بقى إن أحكام المقلد ده إنه لو بلغه حديث النبي

ﷺ؛ فلا يجوز أن يقول: قال فلان، أو قال فلان!

قال النبي ﷺ: "لَيَكُونَنَّ مِنْ أُمَّتِي أَقْوَامٌ، يَسْتَحِلُّونَ الْجِرَّ وَالْحَرِيرَ، وَالْخَمْرَ وَالْمَعَارِفَ" [مجموع

فتاوى ابن باز] كل المعازف.

لا أصل ممكن يكون... أصل ممكن الحديث.

أصل ممكن يكون قصده كذا... أصل ممكن التفسير.

متزوجش.. متعرضش.. الحديث واضح، وتطبيق الصحابة له واضح... خلاص متعرضش بقى.

ما تحاولش تزوغ: بتقليد، أو تأويل، أو هوى.

يعني إيه أو هوى؟

كبر لقي أبوه عمل له شهادة استثمار.

شهادة الاستثمار دي بتاعت فلوس 100 جنيه، دخلت في حاجات،

بقت كام يعني؟ بقت 10000 جنيه، العشر آلاف 9900 ربا ورأس ماله 100.

الشرع بيقول له: تاخذ ال 100 جنيه بتاعتك.

طيب 9900؟ دي فلوس حرام تطلعهم في مصالح المسلمين.

نعم... طيب أنا عايز اتجوز، طيب أنا تعبان، وأنا فقير.

ادفعهم في مصالح المسلمين، وخذ بالك اوي من النقطة دي.

أول ما هيجي له الأمر، أول ما يجي له الفتوى.

لو قال لا.. الكلام ده مش هيمشي الكلام ده مش هينفع فده علامة سوء خاتمة؛ يعني إيه يا

جماعة؟

يعني أول لحظة حين يأتيك الأمر من الله دي الكاميرا شغالة:

سمعنا وأطعنا؟ ولا تحب تزوغ؟ { **وَنُقَلِّبُ أَفْئِدَتَهُمْ وَأَبْصَارَهُمْ كَمَا لَمْ يُؤْمِنُوا بِهِ أَوْلَ مَرَّةٍ** }

[الأنعام: ١١٠]

حين يأتيك الأمر.. أول مرة بتعمل إيه؟

بتؤمن!.. بتطبق!.. ولا لسه بقى هنهايتي معاك، والدنيا هتقوم وهتقعد وهنتعارك، وهنشد في هدم بعض؛ لغاية ما في الآخر بقى إيه يفهم بعد بقى الشد والعراك بعد كل ده، وإنت كمان مش عايز تفهم!

"مَرَّ النَّبِيُّ ﷺ بِامْرَأَةٍ تَبْكِي عِنْدَ قَبْرِ، فَقَالَ: اتَّقِي اللَّهَ وَاصْبِرِي قَالَتْ: إِلَيْكَ عَنِّي، فَإِنَّكَ لَمْ تُصَبِّ بِمُصِيبَتِي" أنت ما تعرفش عندي إيه؟

كل واحد يا جماعة منا فاكِر إن مشاكله هي أكبر مشاكل في العالم.
على فكرة ده إحساس مشترك فيه جميع البشر.

نهاية العالم... إيه يا ابني؟

أنا خلاص متحطم... إيه اللي حصل؟

أصل الامتحانات اتقدمت بس كده، خلاص هو ده الموضوع!

ضعت.. مستقبلي ضاع.. ليه ياعم؟

إنت لازم تنجح السنة دي عديها! ممكن تيجي على نفسك شوية، وتيجي على وقت أكلك ونومك ومتتمش وتجييب، وإيه اللي خلاك متذاكرش طول السنة؟

إيه اللي خلاك تذاكر ليلة الامتحان؟ مين اللي أصل الأصل ده؟ مبدأ عند الطلبة المذاكرة ليلة الامتحان الأصل ده نفسي اعرف مين اللي أصله وبالذات في الجامعة؟

نهاية العالم.. كل مشكله عنده ضرسه واجعه.. انتهى.

خد بس كتافلام و الموضوع هيبقى كويس.

لا لا لا.. كتافلام إيه وبتاع إيه؟ خلاص، أنا هموت!

يا عم هموت إيه؟ ده ضرسك، هو قلبك مفتوح؟

مفيش مشاكل ده كتافلام هيرحك إن شاء الله.

كل واحد فاكر إن مشكلته، أو مصيبتته، أو وجعه هي اللي إيه؟

يقول لك: ده أنا متألم.. ده أنا مبتلى!

تقول له: إنت شفت البلا بعينك يا بني؟ يا ابني احمد ربنا! يا ابني إنت أحسن من ناس كتير.

"إِيَّاكَ عَنِّي، فَإِنَّكَ لَمْ تُصَبِّ بِمُصِيبَتِي" فالنبي ﷺ راح عمل إيه؟ أنا لسة هتكلم معاها خلاص،

هي في نفسية دلوقتي مش مستعدة للسمع، فقيل لها: إنه النبي ﷺ، فقالت له: معذرة؛ لم أعرفك.

المهم بقى الكلمة دي: قال النبي ﷺ: "إِنَّمَا الصَّبْرُ عِنْدَ الصَّدْمَةِ الْأُولَى" [البخاري ومسلم] أول

كلاكيت، مش كلاكيت رقم مية.

مش بنمثل احنا، الكلاكيت الأولاني في التعامل مع الحدث؛ في التعامل مع الحدث، في التعامل

مع الأمر، في التعامل مع النهي، بتعمل إيه؟

بتؤمن (سمعنا وأطعنا) مفيش هوا بيدخل ٩٩٠٠ يطلعوا.

خلاص يطلعوا حالاً.

هذا يثبت قلبه على الإيمان عند الموت... لا.. مش هيحصل.

تقول له: ده ربنا قال... يقولك: مش هيحصل.

وفي ناس بتقول كلام كفري، ولو حصل ايه؟ ولو اتطربأت السما عالارض، ممكن بعد شوية يقبل، لكن خد بالك اللي إنت عملته أول الموقف مش هيعدي.. مش هيعدي.

إنتوا عارفين عمر بن الخطاب -رضي الله عنه- في صلح الحديبية؛ عارفين طبعًا الشروط المجحفة اللي كانت في الصلح.. المهم إن عمر قال ايه؟ ما شككت إلا يومئذ.

النبي ﷺ بيقول له ايه؟ أبو جندل هيرجع.

مسلم هنرده للكفار، واللي هيجي منهم مسلم هنرده، واللي هيطلع من عندنا هنسيبه... ايه ده؟ لما نعطي الدنيا في ديننا؟ يا رسول الله: ليه؟

ألسنا على الحق، أليسوا على الباطل، ألسنت رسول الله حقا؟

نعم، " قال: فَعَلَّامَ نُعْطِي الدِّينَةَ فِي دِينِنَا؟ فَقَالَ: يَا ابْنَ الْخَطَّابِ، إِنِّي رَسُولُ اللَّهِ، وَلَنْ يُضَيِّعَنِي اللَّهُ أَبَدًا" [البخاري] قال: ما شككت إلا يومئذ.

حصل له ذبذبة.. ممكن يكون ما اتكلمش غير الكلمتين دول.

وما اتكلمش غير مع أبو بكر، ولكن عمر بقى يقول لك ايه؟

فعملت لهذا أعمالاً.

قعدت بقى أعمال كثير قوي عشان اكفر عن التذبذب ده، عن الشك ده، ما بالك بقى اللي مش شك بس، اللي حب يزوغ يعمل إيه؟ أد إيه مخالفته لنظر الله!
مش بس شك أن الأمر ده صح، أو إن الأمر ده حكمة، أو أن الأمر ده خير... لا ده بقى بدأ كمان يزوغ، ويهرب، ويعمل ثغرات، ويحتال، ويبرر، ويتكلم، ويعارض.

"فلا يقوم بقلبه شبهة تُعارض الأمر من الله ونهيه، ولا شهوة تمنع من تنفيذه وامتناله" يبقى ولا شبهة، ولا شهوة.

"والأخذ به، ولا تقليد يريحه من بذل الجهد في تلقي الأحكام من مشكاة النصوص" متقلدش حد يكون عائق بينك وبين الله سبحانه وتعالى.

قال سفيان الثوري رحمه الله: "رسول الله ﷺ هو الميزان الأكبر، الذي يوزن عليه كل شيء" ما حدش بيتأخذ كلامه كله يا جماعة.

تقول لي: فلان ده أنا بأخذ كلامه كله.

مفيش حاجة اسمها كده لو كان مين، مفيش حد هيتأخذ كلامه كله؛

- حتى لو صحابي.

- حتى لو تابعي.

- حتى لو من تابعي التابعين.

- حتى لو عالم من العلماء، إمام من الأئمة.

محدث بيتاخذ كلامه كله، إلا واحد بس اللي بيتاخذ كلامه كله: (رسول الله ﷺ)

يقول: "وقد عملت بهذا أهل البصائر من العلماء، ومن غيرهم.

ثم يقول: والمرتبة الثالثة من البصيرة هي البصيرة في الوعد والوعيد" وهي في الحقيقة اللي تخليك تبقى ماشي عدل مع الأوامر.

اللي إنت هتقف بين يدي الله تبارك وتعالى يوم القيامة.

"وهي أن تشهد قيام الله على كل نفس بما كسبت في الخير والشر عاجلاً وأجلاً في دار العمل، ودار الجزاء، وأن ذلك موجب ألوهيته وربوبيته، وعدله، وحكمته، فإن الشك في ذلك شكل في ألوهيته وربوبيته"

يبقى اللي بيتكلم كلمة ومش واخذ باله هيتحاسب عليها.

هذا عنده خلل في الإيمان (نقص)

{ مَالِ هَذَا الْكِتَابِ لَا يُغَادِرُ صَغِيرَةً وَلَا كَبِيرَةً إِلَّا أَحْصَاهَا } [الكهف: ٤٩]

{ وَنَضَعُ الْمَوَازِينَ الْقِسْطَ لِيَوْمِ الْقِيَامَةِ فَلَا تُظْلَمُ نَفْسٌ شَيْئًا وَإِنْ كَانَ مِثْقَالَ حَبَّةٍ مِنْ خَرْدَلٍ أَتَيْنَا بِهَا^ق

وَكَفَىٰ بِنَا حَاسِبِينَ } [الأنبياء: ٤٧]

{ فَمَنْ يَعْمَلْ مِثْقَالَ ذَرَّةٍ خَيْرًا يَرَهُ * وَمَنْ يَعْمَلْ مِثْقَالَ ذَرَّةٍ شَرًّا يَرَهُ } [الزلزلة: ٨، ٧]

يقول: "بل شك في وجوده"

تؤمن بوجود الله، بربوبيته الله، بألوهية الله، يبقى بتؤمن إنك ستقف في يوم القيامة، بين يدي الله عريان، غرلاً، غير مختون، لا أهل، ولا مال وستحاسب على كل شيء؛ فإنه يستحيل عليه خلاف ذلك { **أَفَحَسِبْتُمْ أَنَّمَا خَلَقْنَاكُمْ عَبَثًا وَأَنَّكُمْ إِلَيْنَا لَا تُرْجَعُونَ** } [المؤمنون: ١١٥] { **فَتَعَالَى اللَّهُ** } الذي يظن هذا نسب إلى الله نقص { **فَتَعَالَى اللَّهُ الْمَلِكُ الْحَقُّ لَا إِلَهَ إِلَّا هُوَ رَبُّ الْعَرْشِ الْكَرِيمِ** } [المؤمنون: ١١٦]

هيجي اليوم اللي هنتغسل فيه، كل ما تستحمى افنكر كده.

بص للمية كده اللي نازلة منك دي، وقول هتنزل المية في يوم من الأيام من على خشبة الغسل. كل ما بتلبس وتقلع افنكر لما بيقلعوا الموتى عشان يلبسوهم الكفن. وأما في الآخر يكون وكان بيروح وبيجي وبيسافر وبيركب عربيات وطيارات، وفي الآخر هتروح ثلاث أذرع في ذراع 2 م، متر كده في متر وحاجة.. خلاص انتهى كده. خلاص انتهت القضية، وأعماله يتحاسب عليها تحت بقى لوحده.

يقول: "فشهادة العقل بالجزاء كشهادته بالوحدانية"

شوف كده زي ما العقل بيثبت في الحقيقة، ولا يستطيع أن ينكر أن الله واحد لا شريك له، كذلك أمر الآخرة العقل ما يقدرش ينكره.

يقول: "ولهذا كان معلوم بالعقل وإنما اهتدي إلى تفاصيله بالوحي؛ ولهذا يجعل الله سبحانه إنكار الميعاد كفر به سبحانه؛ لأنه إنكار لقدرته وإلهيته، وكلاهما مستلزم للكفر به"

قال تعالى: { وَإِنْ تَعْجَبْ فَعَجَبٌ قَوْلُهُمْ إِذَا كُنَّا تُرَابًا إِنَّا لَفِي خَلْقٍ جَدِيدٍ ۗ وَأُولَئِكَ الَّذِينَ كَفَرُوا بِرَبِّهِمْ } [الرعد: ٥] عشان أنكروا إيه؟ أنكروا إيه؟ أنكروا وجوده، ولا أنكروا القيامة؟ عشان أنكروا القيامة { إِذَا كُنَّا تُرَابًا إِنَّا لَفِي خَلْقٍ جَدِيدٍ } [الرعد: ٥] كده بينكر إيه؟ القيامة. ربنا قال إيه على ده؟ إن ده كفر بالرب { أُولَئِكَ الَّذِينَ كَفَرُوا بِرَبِّهِمْ ۗ وَأُولَئِكَ الْأَغْلَالُ فِي أَعْنَاقِهِمْ } [الرعد: ٥] { وَأُولَئِكَ أَصْحَابُ النَّارِ ۗ هُمْ فِيهَا خَالِدُونَ } [البقرة: ٢١٧]

الآية فيها تفسيرين:

أحدهما: إن تعجب من قولهم أنذا كنا ترابا أننا لفي خلق جديد.

فعجب قولهم كيف ينكرون هذا وقد خلقوا من تراب ولم يكونوا شيئاً!

عايز اعرف إنت ليه مستكبر قوي إنه يجمعك تاني يعني.. ويعيد خلقك مرة ثانية، مستكبرها ليه؟

إنت أصلاً كنت من الأول لم تكن شيئاً مذكوراً { هَلْ أَتَى عَلَى الْإِنْسَانِ حِينٌ مِّنَ الدَّهْرِ لَمْ يَكُنْ شَيْئًا مَّذْكُورًا } [الإنسان: ١] أتى ولا ما أتاش يا جماعة؟

أتى! أتى زمن طويل قوي قوي مكنتش موجود، وهيجي زمن طويل، وإنت مش موجود.

مستكبر ليه إنه يعيدك تاني؟

والثاني: إن تعجب من شركهم مع الله غيره، وعدم انقيادهم لتوحيده،

وعبادته وحده لا شريك له، فالأعجب من كده إنكارهم للبعث،

وقولهم: { قَوْلُهُمْ إِذَا كُنَّا تُرَابًا إِنَّا لَفِي خَلْقٍ جَدِيدٍ } [الرعد: ٥]

يقول ابن القيم: "وعلى التقديرين فإن إنكار المعاد عجب من الإنسان" يعني لما تشوف حد بيقول الكلام ده: مفيش قيامة، مفيش بعث تقعد تضحك، تتعجب منه قوي.. إنت بتجادل في إيه؟

{ وَضَرَبَ لَنَا مَثَلًا وَنَسِيَ خَلْقَهُ قَالَ مَنْ يُحْيِي الْعِظَامَ وَهِيَ رَمِيمٌ } [يس:٧٨] هو ده سؤال محتاج إجابة؟ { فُلٌ يُحْيِيهَا الَّذِي أَنْشَأَهَا أَوَّلَ مَرَّةٍ وَهُوَ بِكُلِّ خَلْقٍ عَلِيمٌ } [يس:٧٩]

الموضوع واضح، و سهل، وسلس، وبديهي...بس انت اللي بتحاول تزوغ {بَلْ يُرِيدُ الْإِنْسَانُ لِيَفْجُرَ أَمَامَهُ * يَسْأَلُ أَيَّانَ يَوْمُ الْقِيَامَةِ} [القيامة:٥،٦] هتروح فين؟

المشكلة زي ما قلتلك إن إنت ممكن تزوغ..بس مني، من المدرس، من فلان، من صاحبك، بس هتزوج فين من الملك؟ { يَا مَعْشَرَ الْجِنِّ وَالْإِنسِ إِنِ اسْتَرْعَيْتُمْ أَنْ تَتَنَفَّذُوا مِنْ أَقْطَارِ السَّمَاوَاتِ وَالْأَرْضِ فَانفُذُوا ۗ لَا تَتَنَفَّذُونَ إِلَّا بِسُلْطَانٍ } [الرحمن:٣٣]

*هتروح فين؟

{ يَقُولُ الْإِنْسَانُ يَوْمَئِذٍ أَيَّنَ الْمَفْرُ * كَلَّا لَا وَزَرَ } [القيامة:١٠،١١]

القبر مستنيك، الأهوال مستنيك، تطاير الصحف مستنيك، الوقوف بين يدي الله مستنيك، الميزان مستنيك، الصراط مستنيك، الجنة أو النار مستنيك، هتروح فين؟ { فَأَيَّنَ تَذْهَبُونَ } [التكوير:٢٦]

يقول: فإنكار المعاد عجب من الإنسان وهو محض إنكار الرب، والكفر به، والجدد لإلهيته، وقدرته، وحكمته، وعدله، وسلطانه.

فاضل كده إيه؟

اللي احنا نقول اللي حصل لسيدنا عمر: اللي هي إيه؟

"ما شككت إلا يومئذ" اللي هي الحيرة دي.

يقول لك: "كمال البصيرة التخلص من الحيرة" الفرق بين أبو بكر وعمر: إنه رسول الله و ليس يعصيه، وإنه لناصره أبو بكر قال ذلك.

هل النبي قال لأبي بكر الكلام ده؟ لا ولكن كمال البصيرة.

شايف، شايف كل حاجة (كمال البصيرة التخلص من الحيرة) دي نقف معاها إن شاء الله الأسبوع القادم.

أقول قولي هذا وأستغفر الله العظيم لي ولكم، سبحانك اللهم وبحمدك أشهد أن لا إله إلا أنت أستغفرك وأتوب إليك.